

弘揚玄奘文化、增進國際交往 首屆玄奘與絲路文化國際研討會論文集代序

釋慈光

戊戌仲夏，因玄奘絲路之會，拙衲聚諸國俊彥於渭濱。迄於今日，已淹及載餘，事易時移，光陰如駛。金谷別廬，西園舊詠，僕預其間，至今猶憶。嘉會之際，勝友如雲。飽參碩學，通儒高才，並剖析於疑滯；明府令長，縉紳閥閱，猶佇衢而敬迓。遠國而忘遐，故梯山度海，重譯而至者，他域廿八高士；夏土亦聞風，咸競趨而雲合，棧谷沙度者，此土廿四時賢。雖未嘗督聚，而四方多士輻輳。琢磨我佛無生之理；切磋三藏惟識之道。斯文之盛，吾道之行，幸甚幸甚！

然則此非僅為不慧與歸元寺眾之力也，今八表清晏，上下休嘉；年穀頻登，萬國斯和。況夫古雍之為都者，涉三代而歷漢唐之全盛者也。據崤函之險，得八百里秦川之利，陶冶渭洛，實扼天下之要津。尤且至於有唐一代，華夏文明，肇極於斯。沉烽靜柝，偃武右文；商旅四達，八方來儀。故長安之學，乃中古問道之鎖鑰；玄奘之學，亦漢唐佛教之津關。故諸子不棄，非謂拙衲之為，抑長安與玄奘之為也。

不慧一芥凡夫，無超塵之想，乏宣教之能。叨逢兩班不棄，遂於壬午歲承乏歸元。長安歸元者，古刹名藍也。其西依灃河，南面終南。昔三藏歸國，下都之夕，駐止於此。自此每適正月廿三，鄉黨遂因以成習，聚以為紀。至道光歲際，以頻遭兵燹故，僅臥佛殿獨存。不慧與闔寺

緇素，筆路藍縷，開啟山林。歸元遂得重光，功德樓、念佛堂、歸元講堂得以拓基。世間錢貨，莫若幻化色惑，故拙衲不愜己物，建安養之居，竭誠周濟，俾使鄉老耆舊，不致饑饉。又勸率富有之家，協同輸惠，廣施教化。立傳統文化班、冬夏令營、文化講座、禪修體驗營、文化藝術節、文化論壇、紀念廟會等。十餘年間，懼棲遲偃仰之習，恪夙夜匪懈之勤。丕闡文德乎俗眾，務植善本於蒸民。

丙申歲不慧更謬掌鎮安金臺山興隆寺丈室。此寺規拓於西晉，而盛於有唐。玄宗開元廿四載敕各州建龍興寺，此寺遂得增廣，並易額龍興。至民國之際，太虛大師電召鎮安，興佛教會，更易其名為“興隆”，以迄於今。然其大興，則為近歲之所營造，為鎮安縣府之功也。遂使千年道場，終得重光；盛唐名藍，再聞梵響。

玄奘、長安，此二者皆具雍容開納、兼包並蓄之儀度氣象。古長安四門，西望波斯、拂菻；南通占城、渤泥；東接韓、日；北連突厥汗國。城垣之內，則異國百族，聚居於此。珊瑚琥珀，碑磬瑪瑙，赤玻璃、綠金精。異國奇珍，盡致闕下；絲綢陶瓷，盡銷他土。融通交流之利，至斯已極矣。故胸包四海之開放胸襟，方為古長安之真精神所在，亦當為吾輩之所承繼。

今區宇夷靖，日月調辰，值此盛會文集付諸版刻之際，於僧俗各界對此會之大力襄助，拙衲深表謝忱，並發願玄奘與長安之精神能得弘揚，漢傳佛教之雨露能得廣布。猶且寄望學界賢達，能與教界繼續攜手，以促進世界之和平，並為人類未來謀求福祉。

歸元興隆衲子 釋慈光

庚子庚辰乙巳日 謹書於長安歸元丈室